

四庫全書

集部

欽定四庫全書

集部

皇清文頴卷四十一

詳校官檢討臣朱依昊

主事銜臣徐以坤覆勘

覆校官中書臣田尹衡

校對官助教臣吳省蘭

謄錄監生臣陸朝愈

欽定四庫全書

皇清文頴卷四十一

賦

○喜雨賦

有序

張英

康熙十有七年季夏之月經旬不雨暑氣煩蒸火

雲麗空炎景燥物驕陽可畏恒燠有徵

帝心惕然念雨澤愆則難冀豐穰之慶陰氣鬱則恐為

災沴之由爰發

德音下明詔懸帑鐸求昌言嚴恭寅畏齋戒於宮肅穆
精誠禱祠於

帝致齋之次日乙酉陰雲四合電掣雷轟雨沛於中夜
禱祠之次日戊子涼颼倏至烟霏霧結雨澍於亭
午於以滌煩潤槁育物寧人皆

聖心為之感而

天心為之應也

臣

英近侍

內庭備詳

宸憲職居惇史宜誌

天庥猥以蕪詞忝茲盛美敢拜手稽首而作賦曰

蒼蒼無垠者有象之天天心之所屬兮則在乎璇宮之側黼席之前蓋君身所以配帝而主極所以承乾故明作而幽贊兮若璧合而珠聯月維季夏律叶林鐘司辰者赤帝乘權者祝融覩陽景之南至仰大火之昏中維斯時也炎歊蒸鬱熾日蘊隆上無纖雲下無微風陽坂飛烟於火井羲輪銜耀於燭龍氣欲流金威能爍石濯

寒泉而猶溫對冰壺而如炙力已倦於蒲葵衣不勝夫
締綌萬戶千門六街九陌咸流汗之成漿或狂呼而動
魄謂今茲之溽暑實罕邁於疇昔雖迎涼之殿寒露之
臺珠簾高卷綺窓洞開其如畏景暄赫烈日昭回但炎
威之四至鮮薰風之南來列子何以御之而冷然楚王
何以臨之而快哉是蓋夏無時雨陽愆陰伏積此亢旱
凝為煩燠胡以慰我三農長我百穀四野望之而警心
萬夫因之而蒿目

天子曰咨在予一人雨暘有忒矜此兆民沛

王言之渙汗垂清問於絲綸爰咨卿貳民瘼悉陳輟朝
撤膳興於朕身將有事乎

南郊先致潔於明禋於是端居穆清蠲慮澄志上達穹
蒼捷如符契雲油油而被天雷隱隱而出地雨霏霏而
入簾涼依依而生袂聽靜夜之霑濡觀宮槐之含翠此
蓋

睿念之方興已獲上靈之報賜致齋三日時維厥明

天子乃御輕輦聽鸞聲享

園丘禮太清薦紫壇之圭璧奏玉琯之韶頀穆穆乎皇
皇乎合千官之肅而咸師

一人之誠法駕載旋爰居爰處惟德動

天翼日而雨石燕雙飛商羊對舞雲興於西日之方午
始而度鳳城過龍樓氣靄靄而如暮聲颯颯而兼秋既
而滴瀝飄揚滂沱汪濊細珠濺於罌兔飛點侵乎綺綴
其泛碧霄而下也若九天之瀑布高轉於銀河其緣駕

瓦而注也如百道之飛泉下垂於玉砌

天子坐廣厦啟彤扉歌有渰之淒淒詠興雨之祁祁任
輕霑於瑤席從飄灑於

御衣

天澤無疆

宸顏有喜爰命侍臣憑高眺視優渥遍乎九垓霑足同
於萬里豈止畿甸沐膏澤之施三輔獲田疇之美而已
哉古稱雨金雨粟雨玉雨珠曷若靈雨澄映涵濡涼逾

瓊液甘若醍醐良苗乍起酷暑潛驅登斯民於富壽之域而又奚有貧札之虞蓋由我

皇之德馨香上聞故其動於中也膚寸而雨遍天下緼緼若泰山之雲更何藉乎土龍之屑屑與巫史之紛紛古人之言諒哉曰人主應天以實不以文

懋勤殿秋蘭賦

有序

張英

金風流火白露迎涼雲淨天高秋空氣爽

君王宵旰燕閒愛茲澄景御圖書之秘閣發清商之雅

音乃有叢蘭獨榮秋殿芳香自發枝葉相扶植以

青瓷圍以朱檻斯亦托根之至榮者也

臣

朝夕

經幃味彼芳潔敬成蕪賦以奉

宸懽其辭曰

臣聞蘭之生也隱於空山被於幽谷故其守貞也雖無

人而亦芳其德馨也不因風而自續是以尼父興猗蘭
之歌郢客和幽蘭之曲當其植根九畹毓秀三湘昔作
騷人之佩古稱王者之香名楚臺而留賞啟漢殿而發
祥養親續蘭陔之咏燕賓泛蘭渚之觴莫不惜茲嘉卉
欽彼幽光慨自人誇春艷莫采秋英蔽深林而寂處偕
衆草而叢生戲陰崖之翡翠侶芳洲之杜蘅惟敷華於
山澤敢結想於蓬瀛一旦躋瓊階登玉宇拂珠簾迎繡
戶泛上苑之風光含長秋之暮雨誠何羨乎蘭皋豈更

思夫蕙圃於時秋也螢光熠熠蟬聲嘒嘒梧葉初驚飄
搖文砌碧筒漸老將殘玉井之蓮金粟猶遲未發小山
之桂爾獨披紛翠葉歲蕤紫莖花繁露重體弱香輕娟
娟自賞既嬌美乎幽人之潔亭亭獨立復比德於君子
之清以此高致怡我

皇情內殿深嚴左圖右史久祛凡卉獨留瓊蘂枝垂宮
硯色侵丈几何馥馥之襲人每簾動而香起

天子丙夜陳書漏沉宵永風入戶而蟲鳴月臨軒而人

靜繞燈開歷亂之花隔幔送參差之影更憐落卉藉以
雕盤置綺筵而留盼惜餘芳於未殘喜

君心之見珍荷遭遇之良難幸處乎朱門與紫闥永違
乎長坂與層巒將寄言於邁軸敢託詠於崇蘭遂作歌
曰有香草兮華且滋鄰玉樹兮與紫芝自楚澤兮來軒
墀枝挺生兮花離離感君恩兮欣自持觀秋蘭之獨茂
兮豈微草之無知

駕幸闕里賦

有序

張英

皇帝御極二十有三載重熙累洽區宇乂安文德覃敷
聲教暨訖乃稽古時邁肇事岱宗謁祠闕里典禮
崇重恩澤優深臣庶懽欣遠邇嘉歎夫元和盛年
咸平昌世僅奏六代之樂修再拜之文猶垂式簡
編流輝今古詎有遠御

六龍親詘

萬乘展隆儀於稽拜施殊敬於儒先

聖德顯隆如今日者焉洵足以超軼往牒焜耀前紀也

臣

幸際昌時得瞻鉅典雖固陋謏劣不足以發揮

鴻藻然珥筆承明職茲紀載頌揚

休媿敢曠司存謹拜手稽首而獻賦曰

於爍惟

皇繼序纂光本仁祖義昭憲考章奠玉衡於神軸握金
鏡於天閭調四氣以通正飭八風而協祥於是西踰細
柳東跨扶桑交河北徼比景南鄉靡不丹梯走傳碧海

浮航輸琛太府隸名職方耀幽遐以日月
耀鱗介而衣裳越萬里以入贄重九譯而
來王是以化洽太和道隆邃古納九垓之
管鑰總堪輿之扃戶參天地之清寧儼
貞明之作觀文軌合而謠俗同跂喙恬而
草木廡軼埃璫而包混茫駕羲軒而凌三五焉

天子迺高拱垂裳中央運斗容與義林優
游書藪河寶丕宣洛符誕受典學宏文銘
楹箴牖探珠淵之秘荃陟玉山之高阜德
蕩蕩以無名治熙熙而何有既乃沖然

永念穆然深思曰儀象肇啟道法昭垂寢明寢熾惟君
惟師羣聖一揆六經同歸王澤下竭頌聲式微孕星鈐
於上瑞錫麟紱於昌期毓龍蹲之至德挺鳳跼之殊姿
集大成於千古開絕學於來茲溯平鄉之懿躅景闕里
之崇規庶幾哉聞見可接羹牆在斯舉時巡之隆典秩
釋奠之隆儀爾乃乘大路控金鑊蹇翠羽捎文虹屬車
按節繁吹鳴笳七萃鱗附千官景從馳道則五里十里
旌門則一重再重集於泗水之上幸於尼山之宮斯時

也清羽司音初陽應律葭管煙霏芝房露茁氣不慄以
時寒序將周而朔易撫景物之澄鮮攬風雲之明瑟旌
旗捲而廣野回春帳殿開而暮山凝色遂乃肇舉吉祀
肅奉精禋春卿贊采祠官眡牲朱火西蒞元酒東陳嘉
邊廣豆豐粢潔盛振羽籥之六舞合咸英之九成薦祝
號之明信導神紘之降迎穆穆

宸容靡靡天緯殊禮展謁隆文錫賚覲靈爽之長存儼
哲人之如在感神契以潛孚體道貞而昭對洋洋乎優

優乎與珠庭月角授受於千載之間玉節金鉉疇答於
一堂之內也禮度有嚴威儀告竣登堂入奧規周矩還
瞻聖里之岷岿憩廣庭之靜便布兩楹以翼聳峙雙闕
以星懸藉杏壇之修蔭挹璧池之素漣偃息於道德之
府溯泳於圖書之淵於是芝蓋重葩龍旂曲柄貴擬一
人尊侔萬乘述素王之嘉讚發五言之睿詠海嶽遜其
高深星雲並其輝映斯則

聖天子蘊道之淳風崇儒之殊敬也簪纓陪位衿佩圜

橋長裾霧會仙組雲影始橫經以讐問旋拊石而吹匏
嗣遺言於姬孔沐雅化於唐姚禮讓之容咸近光於黎
獻豈弟之澤庶作人於譽髦斯則

聖天子風聲之四訖文治之丕昭也曲阜名區魯原舊
聚陪敦土田復除繇賦增講肄之常負沛匪頒之異數
推恩則徧及師儒錫爵則旁流支庶五經博士不遺凡
蔣之封九命上公奚啻褒成之胙斯則

聖天子崇德之盛心興賢之宏務也於時采甸侯衛公

卿大夫期門式道執戟荷戈文學掌故之士垂髫戴白
之徒縱觀典禮踰濟天衢涵濡化澤屬賦道腴既雀躍
而抃舞亦鳧藻而懽愉萬人一口聲滿公車惟我

后之東巡修百王之令式答珍貺於三靈聽衢謠於百
室卻瓊檢以勿祈屏銀繩而詎飾騶從清嚴儀文簡質
吏不譏呵民無供億協時正律埒虞氏之省方納賈陳
詩儷姬王之述職既陟山以袞對還翕河而問俗採哲
陽之舊歌晞榮光之新燭朝宗滙江漢之波玉帛奉塗

山之籙非漢日之褰茭乃堯年之刻玉若乃慶惠殷流
湛恩四周給租賜帛省刑釋囚虛衷清問博延廣諏如
天光之下濟如露濃之上浮始汪濊於五土旋裔淪於
九州今又茂明至道導揚正學虎炳龍章金追玉琢浴
我以詩書宏我以禮樂盛德登闕大猷輝卓愼六合而
被英蕤鼓八紘而排氛濁誠振古之隆規開天之偉略
也

天子方且回輿京室倚佩軒墀道岸先陟德契自持庀

政考業基命敕幾辨色以臨黼展視夜而啟彤帷定仁
義中正之極稽因革損益之宜不懈冰淵之念彌勤皜
鐸之思所以泰階順軌乾英迎禧上理隆洽茂化雍熙
治方侔於砥屬俗已進於循蜚四海壽康恬於鶉居之
代萬年鼎祚萃於鰲極之儀

朝

陵賦

孫在豐

皇帝御極之二十一載聲教浹乎遐陬威靈震於天宇
蕩滇黔之頑兇殄閩粵之狂豎鉞鉞既施典章具舉崇
徽稱於

兩宮洽歡心於九土爰溯締造之鴻基修

山陵之禋祀進太卜而諏嘉辰兮詔宗伯而稽禮經戒
豐隆以灑塗兮敕招搖使陳鉦閣道直漢以澄輝兮天

駟挾策而耀精羽林羅列以雲布兮鉤陳炳蔚而霞蒸
時則斗柄外指望舒景盈草芊芊以向榮麥茁茁其擢
英迺駕蒼龍鳴鸞鈴馳玉軼仗霓旌宗正陪乘親藩奉
較掌舍設桓虞衡庀幄帑藁儲於司農太常陳其廣樂
詞臣珥筆以隨鑣通侯巡徼而秉稍六卿之屬備官七
萃之屯列幕焱焱煜煜披拂以輶輶兮翠蓋金枝之旖
旒也總總汨汨雷轟而電掣兮千乘萬騎之繁夥也啟
閭闔而度郊圻兮道上谷之名區踰嶢嶢巖而徑雄關兮

循陽侯之所居靈龜負圖以獻瑞兮神龍蚺螭而奉輿
天吳躩踞以趨蹌兮燭陰熠燿以先驅爰抵幽岐以瞻
荒作覲豐沛而眺杕榆其地形則連岡崔嵬峻嶺嵒岼
廣岫四開平原中廓近擁巫閭巨鎮嶽岑巖高洞深拓
陽翕陰遙揖長白綿亘峭闢淵潭窈冥動植焜碧他若
華表通明木葉紫荊蜿蜒環旋孕仙窟靈幽恠神奇不
可殫形其水泉小則松花錦川鴛湖沓渚淤為淖泥濘
為浦激大則襟帶鴨綠磅礴混同滄溟東匯衆水歸宗

驚濤浴日駭浪浮空其灌溉所滋地力所聚則沃茂稻
梁磽叢蘄芋菓美榛松藥珍參附其鳥則鴛鴦鸕鶿鴻
鵠鷺鷥鵲鵲晚水而聯翩鷗鷺挾飈而高翔其獸則青
鼠黃羊蛭蛭距虛獺麋貂狐野馬駒騊睹畜產之蕃滋
洵山海之要都若夫洞闢八門周迴百雉麗譙天開雉
堞鱗次其內則陌通巷接比舍連墉蘭綺柄植乎廣衢
象闕聳構乎雲中有臨崇政有翼篤恭閣開翔鳳時乘
御龍關睢麟趾有恤其宮左宜文德右昭武功櫟櫨錯

列漢之星杓榛拖垂天之虹其外則岡阜蟠護鬱鬱蔥蔥山河繡柱風雨蚪松仰

陵園之在望識王氣之所鍾則有分陝之卿陪京之守聞翠華之莅止競率屬而趨走又有髡鬻之童皤皤之叟咸輟耕以望幸紛駢闐而恐後則見夫鵷班奮伏雉尾中開乾情顧矚而愉怡龍馭弭節而徘徊屯雲罕舒玉綏排金阼陟瑤階嘉樹威蕤以紛披重闈溫清而邃侯端斧展於辰居肅容衛於崇廡乃與臯伊之倫丙魏

之侶斂精澄神齋心滌慮既吉蠲之允臧遂致覲於
列祖建指星之旃樹歷天之旗駕踰輝之神駿翳曲莖
之華芝翕赫芻霍蠖畧蕤綏卿贊采史誦詩宰割牲祝
陳詞揚戡定之赫奕溯謨烈之燕貽玉帛陳神人暢薦
馨香格靈貺駕鷺駿奔以肅穆兮瑞靄氤氲而彌望進
觥觥之圭瓚和泔淡之秬鬯盱蟹旁融君蒿在上禋燎
燦灼於穹窿兮芬苾沛達乎漭沆既通誠而感幽兮知
景福之攸降於是歷神州而巡邊陲乘陽氣而講春蒐

幕漫天之畢張竟野之罟罾尉接陂寧良掩邱列缺施
鞭蚩尤挽鉤綠沉砥鋒天弧貫鏃騎躍房星之精車追
造父之躡矢選夏服之韞刃淬昆吾之鍔凡藩落之所
窒戩置羅之所絳幕义簇之所攬捫流鏑之所撓掣飛
無遁翮走無逸足廼因前禽而示服猛借格獸以示鋤
兇捨翳薈之鷙麋縱巖藪之犴狴搜其吞噬之倫屠其
牙爪之雄爰有勇逾五丁力若烏獲帶鮫函披兕革朶
擐獮狻袒裼徒搏拉虎蹂躪屠狼楚獫狝挫撓怒而遁潛

改咆哮以踧踏遂頰首而草面卒龍伏而就磔爾乃前
網開飛羽停宗鵠止馳韓廬不驚設纚沈罾射蛟捉鯨
鱗魛既留鰓鰕就罟鮪鯉斯陳鯢鮓勿拒衆兆云獲觴
行賞舉醕醴鼓燔魚鰓澍雨應時嘉禾斯播

天子則勤思乎東作矐念乎萬幾廼返旆揚麾旋虬縱
螭赤汗追風叱撥爭蹄鐘磬雷磕廻蒞郊畿勞五校賚
九扈課農桑詢疾苦青災肆赦湛恩斯溥臣隣懽欣士
女忭舞惟時小臣職忝濡毫才慚稽古熊館趨行豹尾

隨伍馬載錫乎天閑身長依乎輦路時瞻雲以咫尺
就日而承煦逢鉅典之喬皇沐

深恩而振詡拜手稽首爰作頌曰於皇上天眷至德
聖武神功昭萬國兮顯承續述馨香格兮滂沛恩膏
喙殖兮宣豫惟時式厥則兮垂衣端拱精寧一兮明
賡賜百憲飭兮萬齡壽昌永無極兮

湯泉賦

有序

徐乾學

古者辭賦之作所以鋪揚鴻業詠歌盛治然竊怪
司馬相如揚雄之徒矜夸車馬侈陳羽獵組織雖
工於主德奚裨焉夫帝王之至德要道無逾於孝
曾子曰孝者置之而塞乎天地施之而橫乎四海
大哉其言之也

臣

備員史館伏見我

皇上奉事

兩宮先意承志聽微察渺可與虞舜姬文比烈矣湯泉

之幸親承

懿旨

鑾輿所過宜有紀載私恐後世不察以上林長楊之製
相為比擬殊失厥旨抑宗元云思報國恩惟有文
章不揣舛陋敬摭蕪詞雖未足測高深於萬一庶
幾矢報答於涓埃云爾賦曰

皇帝御極十有一載庶徵協應羣生畢遂鴻鴈來賓之
候律中南呂之月霜清東野斗指北闕雲既淨而天高

潦將收而水潔

天子於是坐總章戒臣工宣長樂之

懿旨問溫井於無終乃駕

鸞輅載

龍旗千乘雷動萬騎雲馳石鎧犀衣之士連七萃而霧
卷珠旃日羽之兵亘五營以星移其時旭日霽野慶雲
靄天飛廉雨師灑道馳烟宓羸女奔走後先玉帳開
而秋野生春寶炬列而暮川增曙香生槍壘之間綵繞

杉榆之樹

聖心維則意切承懽

慈宮在路出入盤桓遇險道則親扶雕輦奉甘旨則手進珠盤見

玉色之愈和必柔色而問安欲坤貞之永固假炎液以除煩誠

孝思之不匱非往代之遊觀故吉行而徐進爰駐蹕於溫泉夫溫泉者為域中之珍瑞亦天地之神靈白磬上

徹丹砂下沉非神鼎而長沸異龍池而獨深五雲之漿
比潤三危之露同清控湯谷於瀛洲濯日月於中營谷
神不老川德彌盈滌灑腸胃澡雪精神醴泉消疾聞乎
建武之世神水蠲疴不數咸康之辰誠一沐而再浴延
永算於千齡於焉傳

仙蹕設

行宮樓枕嶺而倒影殿當川而抱虹長墉跨於障塞列
岫挿於鴻濛閼邃而寒暑隔岩堯而雲霧通繡帷四幕

層城九重水澹澹而岸花紫烟微微而野樹紅鳴文鷁
於波面奏龍吟於水中玉女乘車而進悅神人灼水而
擎鐘已溫和之悅體自第祿之在躬

慈聖既安

皇情愉悅乃講蒐苗飭羽獵張竟野之罟設垂天之罽
虎落三巖崇山作碣圍經百里羽林羅列馳朱汗之馬
校黃金之埒紫燕晨風紅陽飛鵲凡有名駒無不畢集
為之擢倚天之劍彎落月之弓金甲霜鳴於曠野虹旗

電掣於長空羽毛揚芳九天絳獵火然芳千山紅乃有
參伐之精負隅林莽喑鳴哮嘯摩牙甜掌川谷嘯而風
生林巒聞而振蕩

天子為之抽金戈揮玉矢刃若星流簇如電駛南山白
額應絃而斃谷振千羣山呼萬歲謂聖武如我

皇豈往代所能擬然後登九霄之臺宴八絃之圃管鳴
而嬌鳥不飛簾拂而輕花自舞五蹄仁獸以扶輪九翼
威禽以節鼓是皆

聖孝之禎祥宜受昊蒼之福祐

乘輿旋返傾都聚觀歡聲振地紅塵障天散貔貅之萬
騎聚鴛鴦之千官

皇上方且心存得一學務函三問寢

龍樓聽政未央弘孝思之錫類謀寰寓之又安以河海
為衽席脯麟鳳為漣甘合萬國之歡心極尊養之多端
彼夫漢帝之遊灞滻唐家之幸醴泉豈足以比隆聖世
齊歷大年也哉

西山賦

有序

徐乾學

國家荷天休命聲教四訖川嶽効職百神納貺芸生品物各得其所我

皇上膺累洽之運宣重光之德緝熙執競攷矧圖治萬幾之暇嚮意文學將以揚風抗雅潤色鴻業猗歟休哉

小臣

職在載筆爰極愚陋作西山賦一篇其

辭曰

粵巍都之鼎建資作鎮以表疆環宅中以閤偉應形勝

而光昌猗茲山之秀傑允卓犖乎冀方傍

神京而稱輿衍控險阨而帶康莊乘允方以定位鍾王
氣而克當比金陵之牛首擁雍土之華陽夫其橫據居
庸之塞直接太行之尾天壽嶠崿乎其前芳湖渟毓乎
其趾蜿蜒綿亘絡繹斐疊茗茗亭亭奕奕暉暉或竦或
峙或立或起或淺或深或俯或企或截磔而崩劣或盤
礴而徙倚亙日月而蔽虧受烟雲而搖曳融怡容與坦
迤迢遞周以流水間以疏泉澄泓澹蕩潏繞洄漩露白

石之齒齒滴玉乳之涓涓澆瀟吞吐於谿谷礧礧全湧
於巉巖石磴欹斜而造嶺飛梁橫跨而渡川則有珍禽
異獸詭熊奇族毛羽繽紛齒草歷錄鵙鵲鴛鴦猿鼯麋
鹿黃鳥飛鳴雌雉飲啄啁嘈睨眄之音狡獪奔騰之足
虬姿松柏鳳林梧篠棗柿茂密杳枯窈窕芳葍榮敷丁
香繚繞春杏霏紅而倩粧秋楓鋪錦而如燒殆難得以
備稽不能悉以名貌若夫寺宇之盛金碧之觀丹樓霞
蔚紺殿雲寒飾鏤鏤以彩畫錯珊瑚與木難耀棟榱而

燦燦綴簾櫳之珊珊慨承平之物力撫陳迹而廻環睇
碧雲之飄緲過香岫而流連瞻來青之題額緬翰墨之
猶傳更遠懷於往古考碑碣之殘篇記金遼之軼事惟
雙塔其宛然至於勝國諸陵邱墟莽互銷沈華表之陰
滅沒冬青之路玉魚帝子之宮金椀茂園之墓一吟禾
黍之詩永鑒興亡之故洵矣壯觀靈宅奧區我

皇顧之其樂只且風物繁盛氣象麗都人民來往肩摩
車驅遊人如雲而萃至行客眺聽而踟躕伊天作之有

自固指顧之憑依覽山河於襟袖識帝眷之在斯宜我
皇之高望更穆爾而遠思紹謨烈於文武享景福於神
祇升陟識德授簡稱詩笑秦始之陋刻嗤漢武之靡辭
巨靈芳式歌且舞山嶽兮載懷載柔秉心抑抑布政優
優燔柴望秩仁覃九州嘉祉駢臻愷澤殷流含情珥筆
拜手吟謳乃為頌曰倬彼西山崇岡巨阜百里

京師在

帝左右紫氣常新地靈單厚鬱鬱蒸蒸離離黝黝於萬

斯年受天之祐

聖駕時巡賦

有序

徐乾學

恭惟我

皇上堯兢舜業宵旰時幾運不息於乾樞應無疆於坤
軸煥乎文思赫斯武怒敷天率土輦賁航琛俗已
登於淳古世已躋於仁壽矣猶恐郊圻之外幽隱
之域民有不得其所者將

親拊循之於是舉正望秩之禮式遵時邁之文損益舊
章皆應經義虎賁羽林簡發省約勾陳將啟

渙號肆赦已逋給復湛恩布獲乃

遣祠官備物典冊懷柔百神

翠華所至始於東嶽岱宗爰及鍾山明太祖陵還過先

聖之鄉皆

躬致祭焉經塗幾於萬里往來曾不踰時供張弗煩有

司芻茭勿費百姓商無遷肆農不輟耕恤菑患問

疾苦懲貪墨獎廉能觀民設教省方之義備矣自

虞周以來三千餘年復見今日

微臣

預載筆之末

敢忘盛德之形容哉謹上

聖駕時巡賦一篇

惟二十有三年秋九月

天子時巡於東禮也

帝德廣運壹體遐邇靈旗既偃威弧既弛鯤溟啟而我
疆兮丹島來其侍子廼奇祥異瑞之游臻兮何茅泰鰈
鷁之足紀

聖人端拱京邑翼翼奉三無私建五有極協恭同敬守

官導職府事已底於歌敘兮聽覽猶勤於朝昃將采風而觀民兮必展義而徧德若稽虞典載陳周詩司南行漏權輿震維職方先我於修守兮太卜習吉以告期

玉輅徐動夫清塵兮金雞先降夫紫泥從官咸精騎而輕行兮緣道每紆軫而解駢於是天行雲轉風輕日麗山祇傳警水后稱蹕控極再重緇緇七萃問土訓九州之圖飭形方華離之事後騎方動乎畿甸前驅已屆乎齊地華注蠱其削成灤源激其觴沸抵介邱而遂上屏

鑾輅而步至笑八駿之無庸嗟四載之已瘁修禮秩於
視公陳祝冊而非秘爾乃訪謠俗就高年靡幽弗耀靡
隱弗宣進秀民而勉之嚮學兮召農畷而告之力田加
慶讓於司牧釋怨憤於閭閻星旆曉移雲罕晝遷笳吹
引路鑾音度阡香稼歧穗而夾輪兮朱實交柯而承蓋
睇萬井之生烟兮眺千岑之凝靄屬車無塵而肅肅卷
阿從游而藹藹或來歌而載賡以中孚而交泰也

天子顧侍從而言曰翕河長瀆肇自皇初灑沈澹災相

協厥居羣臣拜手稽首曰都禹之明德其遠矣乎

天子神聖續禹之謨爾乃親循版築周覽廝渠叶潤下
於洪範方幸德水之歸墟桃花泛而無害方竹箭疾而
何虞

皇情豫以繾綣方

天眷切以躊躇陋漢帝之負薪勞使者於河堤圖有蘭
葉之瑞歌非瓠子之悲信安瀾之在望知錫圭之有期
然且疇咨水利民隱是恤覩淮南之巨浸訪海陵之陳

迹五湖積潦而橫流六港淤沙而久塞匪疏濬以為功
恐畎澮之莫洩將

命冬官博謀長策庀器鳩工不愆於日俾慎始以圖終
期一勞而永逸當斯際也降輦御舟維綃鼓柁萬乘飛
渡六龍迅掣祥飈送颿

宸衷怡悅詢井絡之濫觴念導江之往轍升盤巖兮設
旌命戈船兮成列指南徐之睥睨俄北固兮截嶠昔者
山頭匹練直視吳門今也扶老携幼俟望

至尊九華明燭百和然薰綵旃錦幄載路填闐威顏咫尺清問下民顧蓋藏之實寡兮惟故俗之未新何風土之靡靡兮致

天語之諄諄留再日而後發兮沐千載之

殊恩由朱方次曲阿兮歷連岡與高原見舊京之城闕臨前代之陵園樵蘇往而不禁寢殿歸然獨存

天子曰咨有司之過繫元綱之既頽自匹夫而有天下不階成旅雜用王霸流澤既竭遷殷草夏弓劍猶藏灑

埽毋浣吉蠲為饔精意奠餼懿矣夫

至聖之純一而

至德之廣大也然後揚舲捩柁還轅結軌問嶧山經泗
水憩闕里修典祀想龍蹲兮如在識馬鬣兮於此溯圖
書之亮章實孔繇之立制惟弘業之映暉歷元精而孚
契灑

奎藻之洋洋與卿雲而並麗儼對越乎兩楹加頒賜於
四氏秩元公以嬋素王述明光而追統紀可以知先聖

後聖百世一揆者矣於是葭灰飛琯適當中冬千乘迴
薄萬騎從容

法駕言旋起居

兩宮

臨軒穆穆

問寢雖雖爰申戒乎百司蠲疵癘以興庸省方之典既
成痼瘼之恤靡窮已布德而遍德即康功與田功斯萬
民之所以咸和而萬國之所以來同者乎敢作頌曰景

運四葉憲章時巡無射應候農隙是因踐履凋枯行葦
之仁天以順動煦然皆春省成守課勞問農畝興言禹
功率彼河滄江表望幸往恤其民戕戕日觀觸石出雲
英雄逐鹿聖哲獲麟昭答靈貺薦裸享禋錫我福極協
於神人皇矣天保

恭己撫辰不敢暇逸出為民勤陋彼封禪七十二君

長白山賦

吳兆騫

猗茲山之峻極眇羣峯而獨尊秉青陽以出震標皓靈
而燭坤揭龍鄉而作鎮頰鵬溟以為門叅二儀兮永峙
屹九成兮莫倫徒觀其大勢也則截薛巒峯穹窿塘峽
窈邈嶙峋壇漫莽置迴漠漠以橫被岨嶢嶢而極上岵
遼甸吸朔壖騎挹婁瞰朝鮮亘喬基於千里造曾椒於
九天赫兮寡仇峭兮迴拔嶺輪糾以爭互巖巋嶷而相
峴峴千仞兮縹曜壁萬尋兮瓊潔鬱騁險兮千零眇負

高兮蟠霓洵東極之神隲詎西崑之可埒爾乃循覽四
麓攷其周綴爰有蒼松巨林馭蔓黝邃肱天有極橫地
靡際既貶坂而連延亦籠岡而推確根攢危以鱗羅葉
縑獵而羽翳擎莖含飈以鬱翦攢柯冒霧而業倚霄兮
沈沈霽兮默默歛陰火於空心蹙陽波於槎枿乍頓道
而欹卧忽推壑而側植信亥步之未跡知禹桀之莫暨
於是黛凝複嶂烟暝虛嵐森梢陬互埽塹嶺岳景晻時
兮罕曜塗塗歛兮增湍巾曾陰於遙巘髣荒徑於修巖

杳慌罔兮晝舍暮條寥寂兮夏凝寒其中廼有黑鷗青
鷗蒼鷹素鵲皎鵲碧鷄迅鷁俊鷁風騰猛腦霜披勁翮
呀吭軻輶奮翰彌臧或命儔於杪顛或接巢於枝格隣
金眸兮高睇厲青骹兮下擊緇采翠輝殊材栗質喧聒
相驚淪躍自驚鼓觜距以增響翫羽毛而成積極翔羣
之詭錯咸沸卉而斯集若夫魑魍之儔昆駘之屬伏魑
長嘯豪豨奔觸麋麇昏眊於積岨熊彪睽眊於叢木豺
獬斷斷以猛噬猱猱驚透而紛逐般首勁角圜題後目

昏呬晨响風馳雷趺慄林振壑殷巖駭谷至乃青鯉黃
鼬華貂文豹挺修毫之溫潤舍雕采之煒烈豆目睇睒
麥髯狎獵棲跡曾冰宵踰盛雪竄木末而騰趨穴巖窺
而競捷羌托體於寒陬疇効修於華闕伊寄類之夥够
嗟難得而殫說爾廼林徑欲窮迤蹊半墳轉千盤而漸
高出九折而逾礙紆寒產竦嶢崿修渚響湍瀨縈濯
龍之滄淵濯龍沽也欲納鶯之雙派大小納鶯二河殷雷地底倒景
天外駭河流之凌薄劃巖垓而澎湃棧鬱盤於迴溪路

厯屨於嶢峴澗凝空兮誰涉崖踐虛兮儼對於是豁開
直裂嵒嶸如憑抗術阡於鳥際超軌躅於雲層邈半漢
以上躋軼隆巔而究升周步山極肆目巖陁曠若砥原
坦若廣庭纖條不竦卑枝罕莖寒蕪莽莽石道冥冥何
嶒峻外峙而唐壇內平爾乃羣巒結瑤以峻起千巖削
玉以攢立頽砭含皓以捲垣崕崕繚素而叢集蓬五石
以相煥環百里而周幕類瑤臺之偃蹇宛瓊山之崩劣
仰重霄方可捫俯下方兮無極互陰晴於膚寸攬星辰

於盈尺伏岑巖而返眺訝雷雨之下黑爰有千年之冰
太始之雪嵌空岫窻并凌摩岳六尺皚皚衰文喋喋迎
素秋而競飛涉朱炎而自冽嶰壑森淒以月鑒峽嶠炯
晃而鏡徹乍消長於新故疇殫究其融結紛銜耀兮遠
映何吹律兮可熱爾其混同之本鴨綠之原劓為神池
以宅乎其間曾瀾廣濶靈液淪漣振以曲碕之巉崿繚
以襄岸之駢田含靚如拭積明若空乍風披以潏灩倏
霞蒸而潰漚鑿翠啟鱣湍之徑躡雲構蛟人之宮爾乃

疏隘陘穴匳磴跳潛沫駭奔淥汨噴阿而瀉瀑雪砮巖
而瀕溶徂南驟北趨汜聚硤清靈源於千頃淪神委於
二江若其堪竇之所潛演穹廡之所瀆激灌似碓投洞
若機疾並騰傾而灑珠遂奔揚而綴壁羣流既濞四派
迺馳澆濤崇岑喧阗峻岐颯沓雨集漱冽烟霏挂流曾
碧之表淪波空翠之隈倒銀潢而半瀉矯皓蜺而迴飛
於是澹泞安翔蜚螭四會漾漾混濤漉漉振瀨抑魚龍
之餘怒集大抵而為滙潤兮永指晶兮徐邁出乎松花

之限注乎鳥龍之外所以宣天網之舍布壯翔野之襟
帶若攷其瓌奇之所窟宅珍瑋之所景彰則夜珠流照
於素波潁玉攄采於青岡人變抗莖於椒陰良楷挺竒
於松陽靈蛟駭螭而容與羽人撫鶴而棲翔畢山經以
撰異莫茲岳之靈長至其出納望曦懷吐雲霧苞陰陽
以靈秘通元漠而神護小衆山於墜敦渺七表於指顧
嶠嶽則千市未殫縹素則萬重紛聚頓挺拔之地軸俛
嵯峨之天柱故能上當辰曜仰福

帝居抗基卓犖翔勢扶輿踞蒼門而表神宅並青岱而
闢仙閭艷彤雲之晝聚焯紫氣之晨敷孕造夏之玉宇
識臨代之寶符啟式廓於

祖烈增景鑠於

皇圖藏瑤牒兮可竦涌金精兮詎誣瑞我

清芳億載永作固兮不渝

皇清文穎卷四十一

欽定四庫全書

皇清文頴卷四十二

賦

有事於

南郊賦

有序

韓 炎

皇帝即位十有二載

天休游至治化既洽夙夜祇畏不皇康寧勤民奉

天百度庀飭祀事孔明必敬必時冬十有一月日長至

以其日有事于

南郊禮也先是

詔禮臣集議致祭所宜辰及齋戒處所禮臣以周人祭日以朝及闇及歷代齋於別殿之禮以請

詔可先期有三日

皇帝齋於別殿凝精澹慮穆若天通戒百官有司於其署宿散秩金水橋禮臣治祀事皆豫及期未明

皇帝出宮百官皆從大臣陪位掌次導至壇案臨皇邸

有司親事益虔暨厥明升崇告

天禮秩備舉既卒事越翼日

皇帝朝

兩宮還御

太和殿羣臣畢賀則禮美而文志敬以和神明之感通

上下之交泰迎

天祐協庶徵具此時也

臣

莢豎儒次羣臣後伏覲

皇上恭

天成命著存

先烈恪盡於禮本

天本

祖之義實萬於昔之展采錯事者豈以國之常典曠而
不書顧既已備諸史氏恐猶未鋪揚極慮為後世
觀輒不自量搜極愚憊述而賦之其詞曰

於皇維

清

列聖相繼底定四方以擲以難五十餘載內外罔一不
諛庶績咸秩靡大與細禮備樂和風移若振凌殷鑠周
曾不芥蒂固已膺皇矣之眷顧奠萬年之統系揚配
天之弘庥薦告功德之顯懿者矣肆維吾

皇嗣服無疆日監於命之不易神饗之弗克有常視聽
惟民日寧而親之弗敢怠遑立政以簡選賢無方典學
維勤緝熙用光爰除秕莠以起羸厄以產以假或擘而
藏仁覆如天厥德孔明帝其用嘉祚以降康不盟而孚

時克用享於維仲冬律應黃鍾貞元相嬗橐籥無窮烟
煴權輿昭報維崇禮迎長至以達

昊穹

皇上乃先時而戒事集禮官而折衷吉蠲何所辰良何
從既酌陰陽而定朝閣復即別殿而擬齋宮是時猶未
底夫郊祀也游心儲精無垠無極淵蛸蠖護孔靜幽墨
七日三日散致神明之德施薜荔以為席芳卻紅鸞之
重疊曠碧綃以為幃芳屏寶帳之甲乙盛顏失其清虛

曼聲辭其威栗矣蟬翼而翠珍將蘇黃而茹白獨沆瀣
之精英與清音之喻吸洞洞乎肅肅乎禮神之囿頌祇
之室有聞乎其聲若接乎其色百官以次聽庫門之戒
受澤宮之敕往慎乃司各虔厥職爾乃元籥氣應葭管
灰飛香草初榮水泉俄滋惟冬實中惟子是孳雞人傳
警夜如何其

天子乃叶靈辰命鑾輿登翠鳳翳華芝六素蚪四蒼螭
靡奔星之旃翻明月之旗伏鈎陳以翼衛召顏倫以驅

馳揮蚩尤以秉戚趣王良以屬車馴天狼以殲弧捎夔
魑而低垂摧靡蕤綏綵旖旎翕赫慘纚駢應陸離泛
金波之穆穆韻玉露之霏霏肅靈壇而蒞止惟敬將於
天威質明乃薦圭璧延祝嘏升玉牲酌翠斚奏雲門舞
大夏誅蕩蕩神之來風習習神之下儼裴回神之右忽
焱逝神之左神之留光逐星神之馳籛若馬既乃芳薪
上徹燭管肅光東燭滄海西照扶桑南曜丹崖北熠大
荒於時

帝心饗答肩然式憑仙雲五色旭日重輪和風叢集協
氣歆蒸維

三后之在天軼下武而並配乃孝思之維則允神孫之
克對坐紺席以居歆儼祖帷而謦歆寂玉衣其翻飛慰
大風之慷慨洗鐵嶺之風烟湧珠河之流抹枯泉注其
香潔芳草忽其夢藟姚鄉之蓋旋浮原寢之珠重隆既
禮虔而告成肆玉軼而旋反紫烟縈蓋而霏微羣靈扈
蹕而輶蜺磕雷鼓兮駢闐眇天樂兮遠近博臨行淡乎

下房景光彌燭乎長坂膺百福之穰穰敬展謁於

兩宮消詰朝而進觴祝

聖母芳恒嵩告大慶於履長嬀孝養於南風上食則進
靈祇於絳實獻壽則添長線於女紅乃御

太極而受朝集車書之大同於時間平諸王邸霍宗室
通侯小侯天揖時揖或進羔鴈或奉珪璧肅肅習習各
以其秩期門羽林飲飛執戟桂桓設衛戈楯夾立勇踰
貔虎旗拂雲墨樅樅裔裔各以其色四方計吏二公牧

伯来自屏藩獻贄天闕巍巍栗栗各以其績雕題鑿齒
烏皮黃弋丈夫女子左言侮食來享來王不維不繫紛
紛籍籍各自其國禮儀既備仙樂斯徹遠陋秦儀近邁
漢絕長跪者三應山中萬歲之聲叩頭以九赴虞廷簫
韶之節緬神貺嘉答其若彼洎羣情忤舞其如此奠萬
邦燕谷之溫熙百姓春臺之始豫元正芳太和布天下
芳大喜寧獨示一人之慶私奉郊之縣而已於是懷鉛
握槧之臣簪筆持索之士眩耀暉光味飫嘉旨偉盛德

盪盪其寡儔竭愚瞽翼翼之微指旅進而稱曰陛下紹
五三之逸緒綿億萬之大業孝弟昭格於神明王享咸
來乎有截陋赤熛靈威之非經哂玉女仙人之尤悖謝
郊時之煩興斥謳巫之相接絃五十息其悲思樓十二
失其爰業五星之次如珠斯編八神之樹測晷斯協咸
願歌功鏤德不啻於書雲鋪張揚厲比伎於獻韞蓋際
乎時之盛而忘其詞之拙也

天子乃穆然而思曰吁朕其可以或泰惟

天其眷我

祖考之洪烈顯德尚克相予予其庶幾蒙賚予夙夜祇
懼罔或不戒於盤匱罔攸敢弛於袷禴予熟復古訓窮
討制作調元氣於相嫗開治化之習昧七日之復用是
觀心初九之乾敢不若厲於是屏煩營飭齋精謹陽生
審謙盈肅明明歸

乾清

南苑賦

王鴻緒

猗燕畿之雄服據九土之輿區直尾箕而畫野控渤海
以定都侯綏仰止而和會

聖人御焉而膺圖爰有南海鬱鬱國陽帶以灤易漳衛
之水襟以玉泉翠微之岡繞以薊邱督亢之饒沃重以
千秋勝國之遺疆其外則鉅總藁秸稱三輔之腴土焉
聚落基置列灌絳之別墅焉原隰鱗次編羽林之園囿
焉繚以長垣構以崇墉塗以西蜀之丹潤以赤堇之銅

象營室之絕乎天漢似天田之屬乎紫宮遠而望之爍
乎如初升之璧月爛兮如春霽之修虹其內則廣皋狹
畦直塗曲畛千頃鱗鱗羣動蠢蠢鬱嘉木之披離挺喬
柯之輪囷栽修阜之逶迤歷窪谷之蔽隱儼重局之軒
豁羅奇珍而淵蘊其水則陂高梁之流液涵素波而瀕
洞待太液之遊鵠姬樂池之集鳳浪雲浮錦波霞浸凍
冰泉凝沍玉濤迴動中則紫莢綠穉碧蒲翠萍澤芝玉
蕊雞頭紫莖田田似蓋齒齒若鯨文魚媵婢珠蛤含星

上則鳬鷺春舞鴛鴦晴宿虞蓼披紅芙蓉垂綠其樹則
有長生交讓連理合歡靈松菌桂神梓木蘭絳桃素柰
青檉紫檀夏侯之所賦嵇含之所歎漢帝之所移植魏
王之所遊觀莫不菁葱鱗耀樛結蚪蟠其草則有杜若
菴施縹蘭紫蕙慎火離離迷迭穉穉或潤露而朝陽或
迎風而藉地其鳥獸則有蒼鶴千歲文翬五色鵠鵲唼
乎靈沼孔雀貢於南域濯濯白銀之麋龐然黃金之鹿
鷹隼之所推搏獮狔之所騰逐珍禽奇獸或充牣而擾

畜山虞不能錄其名獸人不能殫其族於是層樓蔚起
柘館參差龍櫬耀日鳳桶侵霓周廬交列帷幕密施宮
則明光建章之制殿則九成興慶之規凌瑤光而捫太
乙橫赤道而掩黃旗蓋六龍巡幸之暇而爰居爰處者
實在乎斯若夫景暄妍兮有曜風習習兮自南鳥覘眈
兮和轉林陰鬱而耗耗觀芳辰其韶淑景河洛之美談
寫

宸情兮懌豫命龍駕而戒鸞駟爾乃建翡翠之旗鳴靈

鼉之鼓繕招搖而指河魁面朱雀而背玄武容容與與
千乘萬騎而戾乎其所乃

命八校之長七萃之士騁渠黃騰駮耳張越棘釋盧矢
燬素鷁戈白雉一發兼縱三驅殪兕覈命中之上下而
課其能否既而室弓服羽軍事攸畢神武邁皇山海寧
一羣臣於是蹌蹌躋躋而上萬年之觴陳羶劉之禮歌
吉日之章召揚雄於甘泉命司馬於長楊賡武功以文
德易肅殺而惠以吉康蓋其冬狩夏苗以儆軍實而非

以遊翺也春巡秋省以物土宜而非以驅騁也陰殺陽生以若時紀而非以軼情也獻賦歌詩以貴太平而非以教嬉也歆歟皇哉並西陲之靈臺駕東京之甫草陋漢后之遊汾樂姬宗之在鎬故能使七澤遜其勝九藪讓其奇華林芳樂媿其德楚賓齊客失其詞惟鴻恩之翔洽畀萬族以熙熙爰合符於軒處遂垂拱而治之

西山賦

顧祖榮

維

神京之鼎峙聳碧嶂於西隅接太行而綿亘拱紫禁而環趨峯迴川抱雲密烟疎既春花之若錦亦秋實之如珠境以幽而林靜地以曠而天虛瞻茲山之秀色實平皋之畫圖爾其石逕迢迢溪流曲曲碧雲之寺則絕壁盤空香山之臺則奇峯削玉來青之雲氣常留松盤之嵐光新沐裂泉之潭影臨虛卧佛之泉聲相逐呂洞之

奇石璘璘石景之嶄巖簇簇平波閣畔暗茂樹以當窓
秘魔厓前冠雲峯而架屋或盤曲磴於林端或敞琳宮
於平麓響鐘磬兮隨長風晃金碧兮迎朝旭其山之為
狀也嶽寄竦削曲互崇隆丹青插漢蒼翠浮空峯腰雲
蔽石色苔封直如挺笏橫若游龍草織地而鋪纈柯穿
澗而飛虹削芙蓉於天半秀螺髻於雲中其水則湍激
空明玉泉成沼浦散青萍洲垂紅蓼嫩綠引而荇葉方
長殘紅謝而荷香欲老繞幽谷而潺湲注平湖而浩渺

浮遊魚於鏡中挂飛泉於樹杪朝移漁艇若槎客之泛
銀河夜照螢光若繁星之垂瓊島至於時當春夏灌木
葱蘢繁花擢秀老幹凌空霞映水而成綺雲出岫而蔽
峯碧粘天而無際翠貼地而焉窮芳草發兮山路仄繁
英落兮溪流紅送禽聲之高下兮晨風裊裊含嵐影之
氤氲兮春雨濛濛又若時屆秋冬景物澄澈木落峯明
天空露白林翳山而丹染石凝寒而冰結葉蕭蕭兮影
踈蟲淒淒兮聲咽萬疊陰雲千峯飛雪渺滄海之驚濤

混長空之一色隨四時以改觀歎茲山之曁絕緬巨靈之開鑿偉造物之孕奇三山隔於弱水五嶽奠夫坤維或峻極則攀藤力弱或幽遠則策杖難窺孰若茲山之效靈獨拱衛於

京洛快覽眺之非遥實登臨之足樂敢濡墨而含毫效天台於孫綽

芍藥賦

顧祖榮

青陽弛令離火乘權繁紅銷影新綠闌妍花事過荼蘼
以後風信到芍藥之前於時紫陌塵輕翠郊雨過連塍
接隴分籬別路目迷五色香成百和遠而望之郁郁紛
紛濃如錦綺淺如爛銀碎如剪綃厚如疊茵如火如荼
如比如鄰彷彿芍朱草金芝燦爛芍景星慶雲近而接
之或分或聚或火齊之堆盤或金莖之承露或霓裳起
舞胭脂之雪微飄或綠葉爭扶翡翠之風自護非一狀

之可名亦鏤心而難賦是時也則有侍臣休沐上客開
筵酒徒挈榼詞人劈箋香車繹絡驕馬聯翩日欲落而
未落遊將旋而難旋三枝兩枝插帽沙際水際迴鞭爾
乃壓擔盈車辭根入市或融蠟而封蒂或連泥而剝蕊
或槩几之作供或瑤堦之位置初來則價重朱門漸出
則香殘野寺此固春色之寂奢奇葩之居殿者也考之
往古偏斯濡毫咏黃花於晚節譜香草於離騷即舒李
文成共數牡丹之名種歐陽品就亦推洛邑之奇葩何

將離之佳卉乃棄等於鴻毛豈知載在風詩嘉名最古
羣芳可冠小草莫伍况夫托根

帝里儼上苑之芳菲得氣栽培沐九天之雨露宜其名
譜之所採錄凡卉之所却顧者乎

欽定四庫全書

卷四十二

鄧尉梅花賦

有序

彭定求

姑蘇西山梅花勝處鄧尉為最近自

鑾馭南巡臨幸茲山被

聖澤之鴻龐沐

天章之藻耀益令香林濯彩芳卉晞榮

臣

式聽輿歌謹

為小賦

維青陽之毓粹見玉樹之含芳風臺橫繞月觀輕颺一枝芳春暉早逗幾樹芳凡卉莫當靡不攄遠韻挹清光

孰與夫千巖搖曳萬谷迴翔離離乎如遊衆香之窟霏
霏乎如探羣玉之藏吳會江鄉姑胥山郭縹緲烟巒青
葱林壑過石鼓之嶙峋接銅嶺之磅礴波間明鏡空澄
橋畔彩虹雙落迤邐崇岡差峩傑閣歷鄧尉之周遭梅
英遍於叢薄爾乃韶光乍啟暖律初回南枝潛發東風
暗催則有連村盈塢漫嶺延隈璫姿交映仙蕾爭開深
雪扃寒姑射之神忽降橫參耿耿碧霓裳之舞爭來蓋地
本膏腴花宜林麓繁植同千畝之禾叢生倍萬竿之竹

先杏蕊以舒榮掩蘭皋而蘊馥攬勝萬峯之巔眺遠太湖之曲漁洋疊嶂晨迷烏鉢層巒曉沐疑素練之盈波訝白雲之滿谷若其皓容倚月冷藥當風欲霽而明暉千丈其雨則暗霧萬重繞屋而枝枝連卷嵌石而樹樹摩空磴道窈折澗戶潛通氤氲百和之香真是娑羅樹下汗漫恒沙之數非惟薝蔔林中是以精藍遞興化城作供霽旭融和流澌解凍騷人攀樹而神怡烟客投林而色動聞笛裏之孤吹和琴中之三弄何殊官閣之珍

不減羅浮之夢然而水霜漸澀山澤清癯非同上林之
植誰邀

帝澤之敷縱輪囷於林谷止飄落於江湖何幸蒼龍夙
駕翠葆前驅爰訪壑崗之蹟方探河洛之圖遂令山靈
延佇品彙昭蘇樵牧騰歌齊聞華祝鼓鐘鳴豫競說嵩
呼迓

天顏於芳樹邀

睿賞於仙跗信貞心其有托知皓質之不孤於是

御座雲凝

奎章日麗珠離玉綴羣疑閭苑之遊柏影松聲尚想勾
陳之衛疊巘龍盤飛泉鶴唳鼎盈三實之資枝獻萬年
之瑞緬懷景物恬熙默企

聖心仁知山中踏雪奚誇金谷之榮樹下咏花還作隴
頭之寄

宸翰天章賦

有序

胡會恩

臣聞日星絢采咸瞻法象之垂河洛升禎肇啟苞符之秘聖人乃章為經緯斯世用迪夫昭明建極敷言則萬禩循夫彝則觀文造契亦四表沐夫光華蓋哲皇發越之精英皆造化同流之元氣也恭遇我

皇上睿握義圖神澄軒鏡泰階叶兆盛德覩其日新離照當陽多藝由於天縱合帝皇王而貞運五位攸

崇統天地人以綏猷三才首出顧乃萬幾在御黼
筵不輟夫牙籤乙夜懋勤寶墨時霏於玉檢殷盤
禹鼎發金匱以流徽岫嶠岐陽較銀鈎而集美

宸章煥發

天藻時頒雲漢流暉既宣四庫七畧之奧奎園叶象復
究三蒼八體之源皇哉振古之鴻文偉矣無前之

聖則也

小臣

久廁詞苑夙侍

起居親瞻

雲日之輝莫罄管蠡之測謹頌揚盛美而獻賦曰

猗

聖皇之凝命當人文之化成賡

廟堂之喜起際海宇之昇平允教訖而恩洽洵禮備而
樂明奎壁布其躔曜河嶽羅其精英法乾符之得一含
協氣於穆清乃輝光之下燭森萬象其畢呈洪惟

聖學精深

皇衷睿哲曠識天開英詞颺發接道脉於黜華蘊文思

於義頡博綜圖籍以無遺挹注江海而不竭是以機務
之暇覃精文翰黼藻紛披龍章絢爛碧落昭融卿雲紉
縵小臣愚魯未足以窺所撰也仰觀

寶畫之昭垂固已莫知所讚歎矣聖兮神兮筦天鈞兮
煒兮煌兮倬天章兮譬上蟠而成象亦下際而呈形何
鳳翥鸞騫之足喻匪龍跳虎卧之能評運神明於體製
集書學之大成波磔雄兮金鐵屈兮斧鑿化兮真宰驚於
時宮硯沈碧山鑪泛清瑤管抽兮春葩麗金壺漬兮瑞

露凝遊淵悟兮入渾穆灑神翰兮暢

皇情竊覩夫表章六經闡發列史剖千聖之奧藏一萬
古之聽視揭日月兮提弘綱析微茫兮抽秘旨煥乎鐘
鼎長垂郁乎球圖並美神動天隨雲蒸霞蔚皆精一之
心傳詎鉛槧之能擬洎夫崇儒重道宣教明彛神山

聖域繡膀豐碑燭星垣而振耀鐫琬琰以流徽以至研
歷數之精微訂鐘呂之謠謬甘石所不能窺夔倫所未
及究經

元后之亶聰迪羣蒙而啟牖皆乾文之發舒駕百王以
馳驟乃若寓

奎章於麗賦發

睿詠於瑤箋金聲玉振璧合珠聯韻叶虞庭之紫鳳辭
高解愠之薰絃

翠輦時巡遠邁橫汾之作紫宸端拱時揮復旦之篇莫
不鏗鉤韶濩歆薄雲烟元音奏而和風應律麗則敷而
霽旭呈鮮臣工拜賜而榮渥靡弗蹈舞於堯天繫

聖製之喬皇兼

御書之精妙理無隱而不宣法無微而不到真足冠邱
墳跨典誥掩五緯耀二曜是以榮光奕奕德音秩秩銀
繩啟而草木敷榮翠軸展而河山潤色諦觀虞夏以還
歷數漢唐誼辟雖復逸思雕華清才迅發卓爍乎詞章
研精於翰墨又烏足以仰厥清光而臻斯極則者哉是
以東際扶桑西盡昧谷南橫炎海之表北踰祝栗之族
被

聖人之文教觀光華而沐浴盡一道以同風遂無思而不服是雖日侍琅函時親玉局固未能測至道之根源而窺

天心之所蘊蓄者也乃再拜稽首而系之曰濬哲惟皇發神秘兮披文相質衆美備兮偃波垂露會寶意兮體含飛動協符瑞兮擣掇菁華攄淵懿兮永勒丹笥垂綠笥兮教化笙鏞振大地兮光昭於天被萬類兮

萬壽無疆賦

彭會淇

維天心之純佑兮爰篤生夫我

皇亶聰明以首出兮綿歷服於無疆秉常新之離照兮
體不息之乾綱信久道之化成兮閱五紀而彌昌當大
衍之全策兮符皇極之中央居青陽之右兮迴鑾馭
於東方屬春和之普暢兮迎麗景之舒長日扶輪而耀
彩兮風拂旆而悠颺川嶽貢其珍符兮雲物紀其嘉祥
草木效其華滋兮鳥獸獻其文章矧含生而負性兮靈

萬物而近光羣飲和而食德兮能不忭舞而趨蹌則有
天潢華胄宗盟懿親鳳毛翩翩麟趾振振彤襜翠幄碧
幃朱輪金羈玉勒繡羈錦茵貴剖桐封之瑞榮敷花萼
之春繁弱密須屢分天物鳬鷺行葦時醉犧樽聽雞鳴
而趨長樂隨龍輅而朝

寢門挹霞觴之潏灩斟瓊液之氤氲齊班行而上壽樂
笑語之繽紛亦有元凱名家伊巫望族豐沛馳驅幽岐
櫛沐十葉貂蟬一門華轂爵承世秩之庸俸仰

天庾之祿姻連

帝室似蘿薦之依松職侍

禁廷儼繁星之麗旭榮施祖父之勲勞庇及子孫之齒
錄身依日月思高厚而知慙運際風雲望龍光而敬祝
若夫通籍官寮登朝膺仕周室六卿漢家羣吏委珮蹕
蹕彈冠濟濟或黃髮而備公孤或方剛而膺任使或登
槐棘之班或受封疆之寄或分職於巖廊或効能於都
鄙秩有崇卑情無遐邇享鼎烹之奉固切懷忠叨升斗

之精亦圖報禮幸

聖節之方臨識

天顏之有喜葵思向日敢忘愛戴之忱管欲窺天莫罄
揄揚之美若乃辟雍士子膠庠生徒鴻都詞客虎觀通
儒衣猶縫掖座接簪裾席珍待聘被褐懷瑜觀光而遊
上國挾策而赴京都望清塵而獻賦擁輦道而陳書懷
樂育之仁夙知忠孝仰文明之化倍切歌歆聯袂褰裳
首四民而踴躍擔簦負笈輕千里而翹趨銀甕移來鏤

出萬壽之字芝函捧去裝成五嶽之圖至若村夫巷豎
白叟黃童江湖賈客里井耕農生依闌闌跡逐西東巖
栖谷汲夜宿朝餐忘

帝力於何有瞻

天表而無從咸欣在宥永荷忻懽樂春臺之皞皞愛壽
域之融融指長安於日下識紫氣於雲中莫不塵飛增
嶽草偃從風環區稱慶比戶呼嵩繫含哺而鼓腹擬頌
禱於華封別有異域冠裳殊方幅舄鑿齒雕題洞胸刺

額衣毛茹血之倫穴處巢居之國亦皆望氣歸誠聞風
奉職庭設九賓道通重譯大一統之車書會萬方之玉
帛獻琛貢雉慶

寶歷之悠長航海梯山凜

天威之咫尺信中外之同心合天人而交格盖由仁周
六寓誰忘覆載之恩澤被八荒肯負生成之德岡陵之
願不介而孚芹曝之私經時彌積敷天喜氣即是祥烟
瑞霧之籠葱匝地歡聲不啻琅璫雲璈之考擊豈若歲

星金馬十洲勞武帝之求王母瑤池八駿騁穆王之跡
者哉頌曰春日暉兮淑景明和風扇兮海宇清天垂象
兮地效靈合譽垂芒兮耀玉衡沆瀣為漿兮滴金莖躋
公堂稱兕觥願吾

皇兮常康寧億萬載兮樂太平重曰穆穆我

皇承休命兮垂裳四紀天保定兮萬幾時勅三辰正兮
百度維貞八方靖兮臣民戴德騰歌詠兮欣逢

聖節朝野相慶兮誕受多福日新而月盛兮吾

皇之壽並天地而無竟芳

浙江潮賦

沈三曾

惟太極之端倪肇一元之翕闢天得氣而循環水隨天
而潮汐陽舒而為日精陰斂而為月魄惟日往而月來
應靈潮之出入觀其俯陽燧而抽光臨方諸而吐液魚
腦準其盈虧蚌胎資其潤澤驗物理於自然豈一氣之
偏隅考永池焦釜之論搜海志山經之輯徒驚化鯢之
濤孰覩斷鰲之極王充舐筆而多遺盧肇和鉛而莫識
爾其至神也震不測以為靈至信也秉不爽以為德方

氣升而地沈固乘時而洋溢暨氣降而地浮亦應期而不失當卯酉之日則陰陽之交也氣以交而盛故潮之大也勢以鼓而彌勁當朔望之後則陰陽之壯也氣以壯而升故潮之至也機以激而愈騰應乎乾則天一之所生效乎坤則地六之所成習乎坎故洊至而不爭說乎兌故得秋而自盈然而邦濤未睹瓊海莫經百盈百涸曾傳漏洩三溢三竭但述安寧要不若錢塘之閱覽足懾魄而移情爰考錢塘之為江也遠接瀛壖遙通碧

落束島嶼之滌洄互扶輿之磅礴赴天目之蜿蜒緯富
春之繹絡扼發歛之咽喉襟宣饒之根角上流披嚴子
之裘旁邑採桐君之藥名傳越絕之書地控句吳之索
樟亭四望面面崢嶸龕赭兩山朝朝激搏燦玉礫之光
明曝銀砂之閃爍滙窟宅於龍螭壯盤渦于鮫鰐故其
包含品物釀郁菁英珊瑚明月紫貝瑤瑛丹虬采介神
鯉華鯨殊形詭體萬彙千名固編蒲之所不能載亦然
犀之所不能明惟夫天吳先導海若駿奔龍伯起舞蛟

宮欲吞狂雷隱隱噴雪紛紛走百里於瞬息飛一線于
海門遠而望之乍如玉虹之橫銀漢徐而竦之颺如鐵
騎之驟中原朗朗乎排瑤圃開瓊岑洞靈合沓幢節蕭
森駕閬風之縹緲驅負嶠而來臨娟娟乎如馳玉女揚
素娥明珠翠羽皓齒修蛾見生塵之羅襪悵微步于凌
波浩浩乎如長矛利戟鞭弭橐鞬貔貅萬幟組練千屯
厲前茅與後勁儼玉帳于龍幡隆隆兮如洪鐘疾撞大
呂爭鳴聞韶魯國張樂洞庭總八音之並舉肆曼玉而

擬金但見砰磕奔騰激揚浩蕩挾鯁壑以俱來貫牛斗
而直上跳沫則重城欲浮驚湍則衆峯皆讓波撼石而
吸三靈勢極天而浴萬象勇士見而嘒嘒猛將立而愴
怵擊電轟霆之下笑人語之不聞排山倒海之前喜輕
舟之無恙徒觀其水力之所到蓋不知其幾千萬丈于
是乎起予迄午吮景納光尹公叱而地吼陽侯怒而風
狂素鎧當前識靈胥之旗影銀花鎮後疑霸佐之鋒鉞
維錢王之萬弩獨犀利而莫當射濤頭使東向廼築堤

而捍塘儼天門與碣石峙狂瀾之隄防紹禹功于千載
共山高而水長乃有弄潮之夫迎潮之子舴艋飄搖鳬
鷗容與蔡襄戒而不應馮夷見而竊喜疑木心與石腸
習騎鯨與跨鯉更有寶馬千羣鈿車十里集江滸而來
觀列茶棚與酒市簾窺吳嶺之青座對越山之紫指雪
浪而笑語喧望銀濤而闌干倚乍日暮以歸城覓遺香
于墮珥此觀潮者之勝槩也亦以見潮之神奇而莫比
要而言之方其噫氣交作蜃勢憑陵日月浮動山川鬱

蒸足以增壯夫之氣而振俠客之膺泊乎駭浪就平洪
波舍次曠天宇之澄清靜江花與岸並亦足以使躁人
怡情而貪夫知止是其消息參乎四氣進退運乎六時
滿而能抑謙為之持動而不括靜立其基淵凝澄徹往
復張弛久矣斟酌元氣而為萬物之滋矣况乎

六飛時御萬乘前驅南巡越甸東瞰吳趨表章功德混
一車書河清海晏雲行雨濡澤溉扶桑之國恩流若木
之墟軼陶唐之刻玉邁為汭之披圖

小臣

登瀛忝竊學

海徒虛矢濟川于說命慚作楫于商書論水羨蒙莊之
有識觀濤知枚乘之非誣幸生長乎澤國曾流覽於海
隅極滄溟之偉觀之潘陸之陳敷敢臨池而染翰有望
洋以跼蹐

太液新荷賦

方韓


序維仲夏律中蕤賓薰風初拂時雨方新樹綠陰而冉冉水碧浪而粼粼乳燕穿花而上下遊魚唼藻而浮沉上林則蔥菁交蔭御堤則清迥無塵蓋天下之平久矣人物皆熙熙而自得卉木亦欣欣而向榮浩浩玉泉匯為太液斜繞宮牆遙連禁掖練光萬頃天宇一色平開曉鏡之晶瑩靜映晴空之澄碧汎滄海于襟帶瀉銀河于几席環臺榭以滌洄漾渠荷之的皪方其茆葢既植

菡萏初生田田剪翠片片雕瓊出淥波而霞照搖綺浪
而雲蒸迴風蕩沫似弄珠之夜出映日澄鮮儼濯錦之
晨興洗朝暉芳潏潏裏夕露芳清泠晴與雨芳俱滌華
並葉芳齊馨芳香可贈咏菱江之初月方舟共採結錦
纜于長汀但見晴鳬出浴纖鱗吹萍神龜遊于葉上文
鴛宿乎花陰感萬物之得所想茂育之生成今夫蓮嚼
然不滓淵然內泓根有節以自固莖中虛而不盈辭烟
蘅芳澤畔振華藻芳蓬瀛葉著如規之目花稱君子之

名蓋以根植靈沼跡連梧岡浥

九重之湛露沐

聖人之波光宜其香薰水殿藻溢銀塘並金莖芳吐秀
與芝草芳呈祥齊木禾為上瑞偕幽蘭為國香詎同夫
折之葺被褰以為裳羣辟蘿而為伍昧葵藿之傾陽也
哉



皇清文頴卷四十二